

FAMELOMA-MASO NY ANTOKO TIM

# Tsy azo leferina intsony ny mahazo ny vahoaka hoy Ravalo

Anjaran'ny Boriboritany voalohany, eto Antananarivo Renivohitra, izay sady misy ny toeram-pone-nan'ny filohan'ny antoko Tiako i Madagasikara (TIM), Marc Ravalomanana indray, no nanatanteraka ny famelomamaso, na redynamisation ny antoko tamin'ny sabotsy 21 mey lasa teo, niarahana tamin'ny birao politika. "Tsy azo leferina intsony ny zavatra mahazo ny vahoaka Malagasy, izay latsaka anatin'ny hantsana mangitsokitsoky ny fahoriana ankehitriny. Mitarina sy mitalaha mafy. Tsy rariny intsony izao fiainana misy eto Madagasikara izao", hoy ny filoha Marc Ravalomanana, nandritra izany, izay notanterahana tetsy amin'ny Live Hotel Andavamamba. Notanisainy ireo loza izay anisan'ny mampikaikaika ny vahoaka: tsy amboarina ny lalana, tsy ariana ny fako, miaina amin'ny rano maloto, miaina amin'ny jiro maty lava, ny hetraketraky ny sasany. Nambarany koa, fa nodradradraina ho ren'ireo vahiny toy ny Vondrona Eorôpeanina sy ny Amerikanina, ny fanitsakitsahan'izao fitondrana Rajoelina izao ny Lalampanorena, ka nahitana ny fametrapetrahana fotsiny izany "gouverneur" izany. Mody nolazaina fa "provisoire" kanefa avy eo tsy "provisoire". Tsy najain'ny fitondrana toy ny anak'andriamaso ny fianianana nataony. Nampahatsiahiviny, fa nanaiky ny fanapahankevitra nataon'ny HCC izy tamin'ny taona 2019 mba hanajana ny filamianana teto amin'ny firenena tamin'izany fotoana izany, saingy misy fetrany ny fandeferana ary efa tapitra ilay fetra. "Afaka adidy amin'ny fatana isika", hoy izy. Nanome toky izy, fa tsy hamela ny vahoaka ho fadira-



Ny fameloma-maso ny antoko TIM, tetsy amin'ny Live Hotel Andavamamba.

novana intsony ary miantso azy ireo ho sahy, hijoro ary hiray hina. Ary dieny izao dia efa ampandrenesina izay olona miomankomanana hangalatra sy hametsifetsy ary hamitapitaka eo, fa ho takiana ny marina sy ny mangarahara. Nanotrona izao famelomamaso ny antoko TIM tetsy Andavamamba izao, ny depiote voafidy tao amin'ny Boriboritany voalohany Me Hanitra Razafimanantsoa, ny filohan'ny vondrona parlemantera TIM, ny depiote Fetra Ralambozafimbololona, ny birao politika nasiônalin'ny antoko, nahitana ny sekretera jeneraly Rina Randriamasinoro, sy ny mpandrindra nasiônalin'ny antoko TIM, Jean Claude Rakotonirina.

Isambilo

Eliana Bezaza sy fanaovana Kianja Mitafo

## Mihantsy ady amin'ny vahoakan'i Mahajanga ny fitondrana

Manoloana ny fikasan'ny fitondrana hanatanteraka ny fanamboarana ny kianja mitafo vaovao any Mahajanga faritra Boeny, naneho hevitra mahakasika izany ny sekretera nasiônalin'ny antoko PSD (Parti Social Democrate), Eliana Bezaza. Tsy ny fanaovana io kianja mitafo hahazaka olona 4000 io no olana, hoy i Eliana Bezaza, fa ny fomba hanatanterahana izany. Tokony tsy narodana ny kianja mitafo teo aloha hoy izy, fa tokony nanangana kianja mitafo vaovao tany amin'ny toeran-kafa ny fitondrana. Hafa ny manana 2 noho ny 1, hoy ity mpanao politika ity. Not-siahiviny fa 3 volana no nolazain'ny filoha Andry Rajoelina fa hanangana io kianja mitafo io, nefa hatramin'izao efa 3



Eliana Bezaza, avy amin'ny antoko PSD.

taona aty aoriana mbola tsy vita izany. Tsy ekena hoy izy ny hanapenana lalana, mba hanaovana ity foto-drafitrasa ara-pantanjahantena ity, lalana izay be mpampiasa ao an-drenivohitry ny faritra Boeny. Toy izany koa ny nakana ny ampahany amin'ny kianja Rabemananjara, ka nanjary tsy maha-kianja iraisam-pire-

na intsony izany kianja izany. Ny kianjana tennis namboarina manakaiky izany faritra iznay koa dia nolazainy fa tsy manorantena ny Mahajanga ny fanaovana io foto-drafitrasa io, hoy ihany i Eliana Bezaza, fa resaka fahazoana tsenambaro-panjakana sy bizina fotsiny. Nosoritany ihany koa, fa

tokony ho nisy ny fifampidiniana tamin'ny tompon'andraikitra ara-pantanjahantena, ny ray aman-dreny, ny tompon'andraikitra samihafa tany an-toerana, mialoha ny nandraisana fanapahankevitra ny amin'ny hanaovana izany foto-drafitrasa izany, sy ny fanapenana lalana amin'io toerana io. Ny nisy hoy izy, amboetra fotsiny no nataon'ny fitondrana Rajoelina. Tery ny toerana hanaovana io kianja mitafo io, tsy nahay nandrefy ireo tompon'andraikitra mikasa hanao izany, soso-kevitra hoy izy ny hamerenana ny fanaovana ny kianja mitafo efa teo, ary ny hanaovana ny kianja mitafo vaovao any amin'ny toeran-kafa malalaka, toy ny any Boanamaro ohatra.

Stefa

Anjerimanontolo

## Mitohy ny Oniversite sy ny foibem-pikarohana « maty »

Mbola tsy mivaly hatramin'izao ny fangatahan'ireo mpampianatra mpikaroka, sy mpikaroka mpampianatra eny amin'ny Anjerimanontolo, mi-vondrona ao amin'ny Seces, na ny sendikan'ny mpampianatra mpikaroka eto Madagasikara. Noho izay antony izay, mbola mitohy ny fanakatonana ny eny amin'ny ambaratonga ambony ataon'izy ireo, antsoina hoe: "Oniversite sy foibem-pikarohana maty", na "Universites et CNRs morts". Ni-

tohy omaly alatsinainy sy anio talata izany tsy fiso-kafan'ny Oniversite izany, satria mbola tsy mivaly ny fanomezana fizakantenan'ny Oniversite, ny fandoavana ireo tambin-karama sy karama ho an'ny mpampianatra sy ny mpandraharaha eny amin'ny ambaratonga ambony,.... Momba ity raharaha ity, ny mpianatra no tena mizaka ny tsy eran'ny ainy, amin'izao olana eny amin'ny ambaratonga ambony izao.

Stefa



## NY TENY FIAINANA

Raha misy lehilahy vao nampaka-bady, dia tsy handeha hiantafika izy, ary tsy hampanaovina fanompoana akory, fa havela hitoetra ao an-tranony herintaona ka hampifaly ny vadiny izay vao nampakariny.  
Deuteronomia 24: 5



### Ny Valosoa sy fakafaka

## Fiainam-pirenena Mijaly ny vahoaka Malagasy, maso hafa anefa no ijeren'ny mpitondra

Mitombo hatrany ny fahasahiranana mahazo ny Malagasy noho ny tsy fahaiza-mitantana ny firenena ankehitriny. Mikorontana etsy sy eroa, grevy fitakiana ny zo sy ny karama isan-karazany mbola mitohy hatrany tsy misy fiafarany. Ny vidimpiainana efa mila tsy ho zakan'ny ankamaroan'ny Malagasy. Tsy hita intsony izany hoe: mihinana sakafo intelo isan'andro izany, fa zara raha mahita ny hatokona. Latsaka ao anaty fahasahiranana mangitsokitsoka ny Malagasy ankehitriny. Etsy andaniny anefa ny fitondrana tarihan'ny filoha Andry Rajoelina dia mizahozaho amin'ny toerana izay alehany fa tsy misy toa azy ary ny zavatra tsy vitan'ireo mpitondra nifandimby tao anatin'ny 60 taona no ataony ankehitriny. Maso hafa no ijeren'ny mpitondra ny vahoaka Malagasy, ka tsy fantany ny fahoriana mihatra amin'izy ireo. Misy mba mahatsapa ihany ireo mpitondra sasany milaza fa ny aretina coronavirus sy ny ady any Ukraine no ialàn'izy ireo bala. Tratra daholo anie ny firenena eran'izao tontolo izao, fa tsy i Madagasikara irery e! izay ilay hoe raha tena mpitondra matsilo sy mahay dia mila mitsinjo ny ho avy. Ny vinan'izy ireo aza miovaova, tsy fantatra intsony hoe: inona: IEM ve sa, PEM sa, Plan Marshall sa inona?... Ny hita aloha amin'izao fotoana, mihinana ny iem ny ankamaroan'ny Malagasy!

Helisoa

Tanora TIM Ambohimanarina

## Manofana maimaimpoana ireo hiditra hiasa amin'ny Call Center

Maro amin'izao fotoana ireo asa sosialy karakain'ny Tanora TIM Ambohimanarina, ao amin'ny Boriboritany faha-6 eto Antananarivo Renivohitra, izay tarihan'ny filohany Lalaina Rabezanahary : eo ny fanofanana arak'asa maimaimpoana momban'ny "Call Center", vita ny fiofanana dia ampdirina miasa eny anivon' ireny orinasa ireny ireo tanora vita sivana, maro ireo orinasa miara-miasa, ka izay no ahafahana mampiditra ireo tanora miasa avy hatrany. Ireo tanora eny Ambohimanarina ihany aloha no hisitraka an'izay ary tsy mifidy na avy aiza na avy aiza, fa hisitraka izany avokoa. Mitohy koa ny fampianarana maimaimpoana ho an'ny fampianarana Informatique sy Langue Anglaise, na fiteny anglisy, izay efa herintaona, no nanaovana azy. Amin'ny farany volana Jona dia hanomboka indray koa ny Cours Faradoboka ho an'ny mpanala fanadinana BACC, izay fanaony efa nandritra ny 4 taona. Mila tanora tompon'andraikitra, vonona hanova rasa eo amin'ny sehatra ara-politika; tsy voatery hoe : manana andraikitra na toerana ambony vao afaka hanasoa ny mpiara-belona", hoy ihany Lalaina Rabezanahary. 50 eo ireo andiany voalohany amin'io fampiofanana Call Center, hataon'ny Tanora TIM Ambohimanarina io.



Lalaina Rabezanahary, avy amin'ny Tanora TIM Ambohimanarina.

Isambilo